

## «Que d'heja chatto üna resposta fich interessanta»

**In dumengia saira ho Valentina Parolini preschanto sia prüm crimi «La melodia da la già». L'autura, chi'd es creschida sü a Samedan, lavura scu magistra secundara a Küblis e sieus scolars e scolaras la haun deda l'impuls da scriver ün crimi per giuvenils.**

Il nouv crimi per giuvenils «La melodia da la già» giouva a Samedan, il lö inua cha Valentina Parolini es creschida sü. «Vairamaing sun eau creschida sü triling. Mieus genituors sun Taliauns e nus vains adüna discurreu taliaun a chesa – a scoula rumauntsch e tudas-ch», disch la nouva autura da 30 ans. Zieva avair frequento la scoula primara e'l gimnasi a l'Academia Engiadina, s'ho ella decisa da fer ün an intermediar: «In quel an d'heja pruvo oura diversas lavuors. Traunter oter d'heja fat ün practicum tar l'ANR e tal RTR.» A la fin s'ho Valentina Parolini inscrista per fer la scolaziun da magistra secundara a Turich.

**Il diplom nun es auncha gnieu druvo** «Eau d'he eir piglio il ram rumauntsch scu ram supplementer. A l'Universited da Turich d'heja alura frequento diversas prelecziuns e d'he eir survgnieu il diplom per instruir rumauntsch sü il nivel secundar», disch Valentina Parolini.

In seguit a la scolaziun, ho'la instruiu trais ans a Turich e daspö il 2019 lavur'la scu magistra secundara a Küblis – cun sieu amih abit'la però a Cuira. «Vairamaing vulai vi turner in Engiadina, ma que nun es ieu sü cun mieus plauns. Perque nu d'heja auncha pudieu der scoula in rumauntsch.»

### Ün gener motivant

Avaunt trais ans, aunch'auz la pandemia, ho ün discuors cun sieus scolars a Küblis do ils prüms impuls per scriver ün cudesch: «Els d'eiran da l'avis, cha



Valentina Parolini ho düraunt la pandemia scrit sieu prüm crimi per puter – l'impuls da scriver ün raquint per giuvenils ho'la clappo da sieus scolars.

fotografia: mad

giuvenils d'hozindi nu legian pü uschè gugent cudeschs e cha ler saja insomma lungurus», disch Valentina Parolini.

Ella ho vulieu savair da sias scolaras e scolars, che gener chi tils motivess il pü ferm da ler darcho üna vouta ün cudesch. La resposta d'eira magari clera: il crimi. «Il scolars haun dit, cha tal crimi

possa il lectur as parteciper a l'istorgia e chatter oura misteris. Que d'heja chatto üna resposta fich interessanta.»

### Üna pitschna cumpensaziun

Cun ir a lavur aint in l'auto ed in seguit a quist discuors, vaiva Valentina Parolini l'ideja ch'ella pudess svesc scriver

ün crimi per giuvenils – ma per rumauntsch. «In rumauntsch, ma impustüt per puter, nu do que auncha uschè ün crimi per giuvenils. Eau vulai-va crear qualchosa nouv e pü speciel», disch Valentina Parolini. Ella agiundscha, ch'ella scrivaiva già a scoula pü gugent istorgias per ru-

mauntsch – quel saja eir pü daspera al taliaun cu il tudas-ch – e ch'ella nun hegia da tschercher ils plects scu in tudas-ch.

Cun que cha Valentina Parolinin nun ho auncha instruiu per rumauntsch e viva in contuorns tudas-chs, as pudess vzair quista prüm ouvra scu tscherta cumpensaziun per na auncha pudair avair do scoula per rumauntsch. Che managia l'autura? «D'üna vart es que üna cumpensaziun. Ma eau discuoer listess mincha di rumauntsch cun mieu amih, el discuoorra vallader, uschè ch'eu drouv aunch'adüna il rumauntsch», disch Valentina Parolini.

### Il slang dals giuvenils

Ün ulteriur motiv cha Valentina Parolini ho scrit il crimi per puter es ch'ella vout eir pussibiliter als giuvenils engiadinais da ler qualchosa auctel. «Eau am d'he eir decisa da scriver quist cudesch per quels chi haun auncha lecciuns da rumauntsch. Ma eir per mieus collegas magisters, ch'eir els hegian darcho üna vouta ün nouv cudesch rumauntsch. Que nun exista simplamaing na bger», declera Valentina Parolini. Per render pü attractiv il cudesch, ho l'autura eir fat adöver dal slang da giuvenils. Perque ho'la observo ün pö sieus scolars, ho eir fat dumandas e s'ho infurmeda davart las medias socielas. «Que m'interessa però in general, cu ch'els comunichechan. Eau d'he eir fat dumandas, ma sainza avair il cudesch aint il cho.»

Düraunt la pandemia ho Valentina Parolini alura scrit il crimi «La melodia da la già». Zieva ch'ella ho scrit il cudesch haun Elvira Pünchera Bott e Michele Badilatti surpiglio il lectorat. Valentina Parolini disch: «Elvira m'ho impustüt güdo cun la lingua e da la perfeziuner. Eau d'he listess bado cha tschertas robas d'eiran in vallader – Michele ho alura aunch'üna vouta corret tuot.» Valentina Parolini es plain aspettativas pels resuns davart il nouv crimi. «Eau d'he schond auncha dapü idejas, ma uossa vulesc eau gioidair quist cudesch ed alura guardi inavaunt», uschè la nouva autura.

Martin Camichel/fmr

## Giubileum da 40 ons biblioteca populara Scuol

**In sonda passada ha gnü lö üna festa a chaschun dal 40avel cumplion da la biblioteca populara da Scuol. Ün inscunter cun diversas occurrenz, cun restoraziun, star da cumpagnia e s'algardar a la naschentscha da la biblioteca.**

La festa da cumplion da 40 ons biblioteca populara Scuol es gnüda organisada da la squadra da las bibliotecas ed ha sport üna buna survista dal passà e dal stadi dad hoz. Quella ha gnü lö davant ed illa Chasa du Parc a Scuol cun atracziuns per uffants e creschüts. La biblioteca es dachasa sü il plan terrain illa Chasa du Parc e spordscha, sco cha Annina Mutzner ha dit, var 7000 cudeschs, DVS's e gös auditivs. «Portader es il cumün da Scuol e las sets bibliotecas chi lavuran parzialmaing per üna pitschna pajja. Duos da nussas han fat il certificat e la scolaziun da bibliotecas e nussas fain quai sper la lavur dal minchadi», ha orientà Seraina Taisch. La biblioteca es averta il lündeschdi ed il venderdi da las 15.30 a las 19.00 ed il marcurdi da las 9.00 a las 11.00 e da las 19.00 a las 20.30. Uffants e creschüts han la pussibilità da tour a fit cudeschs ed oter plü o da sduvlar e's laschar cugliar da las bibliotecas.



Armon Parolini cun Valerie Dolfi, Bernadette Bezzola e Mia Mathis han orientà davart l'istorgia da la biblioteca populara a Scuol.

fotografia: Benedict Stecher

Armon Parolini insembel cun trais bibliotecas da plü bod han quintà davart ils cumanzaments da l'istorgia da la biblioteca populara da Scuol. «Mia mamma d'eira üna duonna chi güdai-va in tuot las situaziuns pussiblas, ella

d'eira illa reuniun sociala, ella d'eira eir iniziata da la pravenda ed in oters gremis. Intuorn dal 1980 ha Tista Murk chi d'eira president da las bibliotecas svizras intimà a las valladas da far in mincha cumün üna biblioteca.»

Ed eir là ha Milla Parolini tut part cun amo otras duonnas chi derivaivan da las Grischnas, ellas s'han occupadas da quista lezcha. Quai d'eiran Ulrica Vital, Anni Rizzi, Pieretta Tönet e Ruth Luzi.

Plü tard, davo l'on 1984 sun gnüdas pro ulteriusas duonnas chi d'eiran preschaintas sonda passada: Valerie Dolfi, Bernadette Bezzola, Mia Mathis ed otras. I s'es i in tschercha da localitats e Dolfi ha lura quintà: «Il prüm vaina pudü dispuoner d'üna località illa Chasa du Parc, ma be la part davantvart cun l'entrada directa da la via. Ün ingrondimaint s'haja realisà 20 ons plü tard e tuot las cartinas culs inviamaints necessaris da la cartoteca vaina stuvü scriver a man.» La località es svelta statta massa pitschna ed i s'ha eir adüna darcheu stuvü cloccar porta pro'l cumün per cuernar las finanzas. Las duonnas han invidà il capo da cumün, quella jada Not Carl cul cussagl da cumün ad üna visita da la biblioteca. Ellas vaivan preparà ün bun aperitiv e muossà lur möd da lavurar e quai ha gnü l'esit cha'l cumün s'ha decis da collavurar. Dal 1998 s'haja realisà ün ingrondimaint da la biblioteca ed installà ün sistem da computer. Las iniziantas s'han lura retrattas e fat piazza ad üna nouva squadra cun glied plü giuvna e cun ideas novas. La biblioteca es adüna gnüda dovrada diligiantamaing dad uffants e vaiva eir il suottitel biblioteca da scoula. Sonda passada al di da las portas avertas han ils visitaders pudü s'atschertar cha la squadra cun set duonnas giuvnas praistan üna buna lavur instancabla pel bön public.

Benedict Stecher/fmr